



QUESTION CARDINALE
A DISPUTER AVX ESCHOLES
DE MEDECINE

IEVDY MATIN, 2. D'AVRIL, SOVBS
LA PRESIDENCE DE MAISTRE
CHARLES GVILLEMEAV,
DOCTEVR EN MEDECINE
DE LA FACVLTE DE PARIS.

*La Methode d'Hippocrate est-elle la plus certaine, la plus
seure, & la plus excellente de toutes à guarir
les maladies?*



LA MEDECINE qu'on peut appeller
vn don de Dieu, & vn outil salutaire de
sa main *a* toute puissante, qui a plus trou-
vé *b* de merveilles en l'homme, que
l'homme n'en connoist en foy-mesme;
c le plus excellent de tous les Arts, a esté divinement

a Heroph.
apud Gal.
l. 6. de com-
pos. med.
sec. loc. c. 3.
medica-
mentā vo-
cabat au-
xiliaries
Deorum
manus.

A

b Cass. lib. 6. var. formula 19. créée, pour secourir l'humaine fragilité: comme elle est sœur *d* & compagne de la sagesse, aussi n'est-elle pas moins *e* ancienne; & n'a esté autresfois en son commencement qu'une science de bien peu *f* de plantes. Cette illustre ouvrière par un effet tout particulier de l'amour de Dieu envers les hommes, donnée à la terre pour y travailler à leur commun bien, à cela de propre, de suppléer à ce qui *g* défaut, & de retrancher ce qui est superflu. Sa fin principale est la santé, qui aboutit à un parfait accomplissement de toutes les fonctions du corps humain. Quant à son employ, il consiste à guerir *h* promptement, seurement & agreablement; ce qu'elle fait aussi le plustost qu'il se peut, & par des voyes qui sont véritablement legitimes. Pour cette mesme fin, elle se sert à la maniere des Grecs, non pas d'un tas de drogues malignes, acres, brulantes, occultes, & veneneuses; mais bien de peu de remedes, choisis avec iugement, esprouvez par un long usage, temperez comme il faut, & plus puissans que la maladie; dont ils arrachent entierement la cause, sans s'arrester aux symptomes. Elle ne touche point neantmoins *i* ny aux maux desesperes, ny aux incurables; & bien souuent mesme elle se relasche, sans rien ordonner; & avance *k* plus en se reposant, qu'elle ne feroit à force d'agir. Adioustez-y qu'elle n'est pas seulement utile aux malades, mais encor aux sains, dont elle reestablit les uns, & conserve les autres. C'est donc le Medecin qui guerit, favorisé de l'assistance Divine, & de *l* l'Occasion, dont il seait

e Hipp. in Iege. Medicina omnium artium est preclarissima.

d Medici-na soror Philo-so-phie. Ter. lib. de an.

e ab anti-quo exi-stens, Hip. lib. de vet. Med.

f Medici-na quondam paucarum fuit scien-tia herba-rum. sene-ca epist. 95.

g Medicina est adfectio deficientium, & detractio redundantium. Hipp. lib. de Flatibus.

h officium est Medici ut tutò, ut celeriter, ut iucundè curet. Cor. Celsus lib. 3. cap. 4.

& Galen. lib. 14. Meth. i Eorum qui à morbis victi sunt, curationem non oportet aggredi. Hipp. lib. de Aere. k Medici quiete nonnumquam plus profunt quam mouendo, agendòque. Tit. Linius lib. 2. dec. 3.

l Medicus est inuentor occasionis, Gal. comm. v. in lib. 6. Epid.

bien se servir heureusement, quand elle se presente. Pour à quoy parvenir, il est conduit par la vraye science, iointe à la sagesse, & non point par le Hasard, ny par la Fortune, cette fausse & aveugle divinité des mortels, qui l'adorent, tant ils sont fous, & luy sacrifient. Car il est certain que la temerité ne se rencontre iamais avec la sagesse, que le hazard n'a point de place dans vn conseil bien estably; & qu'ainsi vn esprit bien fait, à qui rien ne semble estrange, reiertant ce qui est casuel, conduit prudemment selon les regles de l'Art, toute l'œuvre de la guerison. La Philosophie fille *m* de l'Admiration, est vne chose tres-relevée, mais qui ne regarde que peu de personnes; & l'Eloquence *n* bien que merveilleuse de soy, est assez souvent plus dommageable qu'utile. La Medecine seule a cet avantage, d'estre necessaire à tout le monde: aussi est-il vray que c'est seulement de la Nature, cette grande Reyne des mortels, dont le Medecin se peut dire Ministre. Mais de son costé, il en a d'autres qui le doivent servir, & n'agir par consequent que par ses ordres. Tels sont, par exemple, les Chirurgiens, ces Anciens & nobles Ouvriers, à qui la prudence conduit la main, l'adresse la soustient, l'experience la rend heureuse; & generalement comme ceux qui gardent & veillent les malades, comme aussi les Baigneurs, les Herboristes & les Apothiquaires, dont on se passeroit plus heureusement que l'on ne s'en sert. Que s'ils relevent tous de la Medecine; ce n'est pas vne merveille bien grande, puis que c'est le seul de tous les Arts qui commande *o* aux Souverains, & qui se donne de l'empire sur ceux qui en ont vn absolu sur les autres. A raison dequoy les Grecs n'honorent pas sans suiect ses Professeurs, de l'illustre nom de PRINCES, par eux ap-

m Per admirationē homines philosophari cōperunt. *Arist. l. 1. Metaph.*

n Eloquētia res admirabilis, non pluribus prodest, quā nocet, sola est Medicina, quā opus sit omnibus. *Quintil. declam. 263.*

o Sola artium Medicina imperatoribus imperat. *Plinius hist. nat. lib. 24. cap. 1.*

p Præstan-
tior qui
minùs pec-
cat. Gal. in
Meth.

q Homici-
dij crimen
est in ho-
minis sa-
lute pec-
care. Cass.
lib. 6. ve-
riar. ser-
mula 19.

r Huius-
modi Me-
dici simil-
limi sunt
personis,
quæ in
tragediis
introdu-
cuntur.
Hippoc. in
Lege.

pellés MÉAONTEZ, qui est le mesme que *Medentes*, chez les Latins, c'est à dire, Medecins. Le meilleur de tous est celuy, qui avec peu de remedes aussi aisez à trouver, qu'ils sont faciles à preparer, s'acquitte de son devoir, & qui par ce moyen enguerit plus luy seul, que ne font ensemble les plus fameux Charlatans avecque ce nombre infiny de drogues, dont ils se servent, pour autoriser leur imposture, qui n'est pas moins odieuse à la Santé, souverain bien de la vie, qu'elle est chere à l'ignorance, creature de la fourberie, & sa fille vnique. Mais il n'en est point de plus accomply p que celuy qui manque le moins, estant vn crime q digne de mort, que de faillir, où il s'agist de la vie des hommes. Le vray Medecin n'est assurement, ny vn r Acteur de Tragedie, ny vn Interprete de songes, ny vn Impositeur enflé de vent, ny vn fourbe d'Altrologue; ny vn mal-heureux souffleur d'Alchymie. Il n'est point du nombre de ces ambicieux affronteurs, qu'on voit courir à perte d'haleine apres l'approbation d'une Populace ignorante; travaillée ordinairement d'une ardante demangeaison de toute sorte de nouveautez: Il n'est point de ces vendeurs de fumée, dont les denrées s'en vont au neant: De ces coupe-bourses, à qui l'avarice fait ofer tout sans rien craindre; De ces Empiriques depourvus de sçavoir & d'experience: ny de ces grands & importuns Hableurs, qui ne font rien moins que ce qu'ils paroissent. C'est tout au contraire vn vray homme de bien, parfaitement habile & sçavant en la guerison des maladies. C'est en la personne d'Hippocrate vn second Galien, & en celle de Galien vn autre Aretée. Quoy plus? Ce n'est point vn Arabe ignorant & Barbare; mais vn homme civil & capable, qui a leu & releu

& releu les anciens Auteurs, qui ne se mescompte nullement en la connoissance de la Cause, qui ne s'abuse point en ce qui semble *divin*, & mesme extraordinaire aux maladies, qui connoist ponctuellement le genie des jours Critiques; qui ne croit pas que tant qu'ils durent, il faille se reposer, & ne faire aucun remede, à la maniere des Juifs, & des *Diatritaires*, ou faux Methodiques; Qui sçait distinguer judicieusement vne maladie d'une autre; qui par vne prevoyance presque divine va non seulement au deuant des accidens & des symptomes qui accompagnent les maladies, mais en previent encore les evenemens; qui est en vn mot, vray Philosophe, non pas Cajoleur, ny Complaisant; Dogmatique, non pas Empirique; Chirurgien tres-expert, & non pas Bourreau. Que si quelqu'un se peut dire tel, celuy-la sans doute doit estre tenu pour vn homme qui en vaut beaucoup d'autres; ou mesme pour vn Demi-Dieu, dont la grandeur

J Si quid divini in morbis inest. Hippo. lib. Prænotionum.

t Philosophiæ cognitionem Medico necessariâ esse probavit Galen.

Escale, ou peu s'en faut, celle de Jupiter.

in lib. quod optimus Medicus idem sit ac Philosophus.

v Vir Medicus multis aliis præstantior vnus. *Homerus, Iliados li.*

TELS ont esté par vne grace particuliere de Dieu, Hippocrate, & Galien, ces deux Hommes merveilleux, & tout à fait extraordinaires: Le premier se peut nommer à bon droit, l'Astre & la lumiere de la vraye Medecine; aussi peu capable que le Soleil, ny de tromper, ny d'estre trompé. Car en effet, y a-t'il quelqu'un qui le puisse convaincre d'erreur & de fausseté? Il est assurément le vray Prince de la Medecine Rationelle, la source feconde où les grands Esprits trouuent toujours à puiser, sans

a Hippocrates, qui tam fallere quam falli nescit. *Macrobius in somniæ scipionis, lib. 1. cap. 6.*

que jamais elle se tarisse. C'est luy qui devant que la Philosophie fût née, ou connue, pouuoit se vanter d'y exceller dé-jà; luy que tout le monde loüe, & qu'il ne sçauoit assez loüer: Luy qui se peut dire la Guide tres-assurée pour bien panser les malades: le plus grand de tous les Philosophes, & de tous les Medecins; l'Ouvrier incomparable en sçavoir, en vigilance, & en generosité, à qui nous devons la connoissance de toutes les bonnes Disciplines, & de tous les plüs beaux Arts qu'il a le premier inventez, & mis en leur perfection derniere: tres-bon Maistre en l'Art de panser & de guarir: admiré de tous, & suiuy de peu de gens; car où sont ceux qui peuvent l'atteindre? Personnage vraiment divin, qui poussé par vn pur acte de Charité envers les hommes, non par vne avarice convoitise d'or & d'argent, ny par l'esclat d'vne vaine gloire, traittoit sans fard, & sans tromperie les malades: conducteur fidele de ceux qu'il suit, auxquels, avant tous, il a montré le droit chemin qu'il a descouvert; Guide infailible de la tres-certaine Methode instituée par luy-mesme, qui tout le premier a trouvé les moyens de secourir avec efficace l'ayde & l'ouvrage de la Nature; Homme à vray dire, qui estoit vn original de vertu, qui tesmoignoit en tout & par tout, d'avoir vn esprit plus qu'humain, & *b* qui ne fit jamais bien, pour paraître l'avoir fait, mais pource qu'il ne pouvoit que bien faire; Homme, dy-je, dont Aristotele a esté l'Interprete en la connoissance des Secrets de la Nature; de qui les enseignemens ont servy de regle & de niveau à la doctrine de Platon; Reparatrice veritable de l'Anatomie entierement perdue, laquelle est à la Medecine, ce qu'estoit le fil d'Ariadne, dans les destours du labyrinthe:

b *velleius*
Paterculus,
de Catone
Vticensi.
lib. 2. hist.

Premier Inventeur de l'Indication, qui a beaucoup enseigné en peu de paroles, & toutes bien dites; Genie admirable, qui paroist obscur, pource qu'il est bref: mais qui est moins obscur qu'il n'est bref: de qui les oracles sont comme inspirez d'une voix celeste, les decrets plus certains que les Oracles mesmes. Que s'il a laissé quelque chose à dire, il l'a fait, pour avoir presque tout inventé: ou s'il l'a seulement esbauché, il n'a pourtant rien escrit, sans une grande raison; si obligeant au reste, & d'un si bon naturel, qu'il n'a rien sceu, qu'il n'ait bien voulu que nous sceussions, & que mesmes il n'ait respandu avec une profusion generalement utile à tout le monde. Mais si recommandable sur tout, soit pour la vivacité, soit pour la sage conduite de son esprit, que personne ne se vantera jamais en vain de savoir ce qu'il a ignoré. Au grand Hippocrate a succédé un autre presque luy-mesme: c'est le fameux Galien, qui a remis en usage cette noble & tres-utile connoissance de la Medecine, publiée au monde par Hippocrate, mais apres sa mort abandonnée par la nonchalance des hommes, & ensevelie sous les ruines du temps. Il estoit natif d'Asie, comme son glorieux predecesseur; & apres luy le premier des Medecins: il se pouvoit dire aussi Medecin sans second, & relevé par-dessus tous les autres. Telsmoins ses Escrits, dont il s'en est perdu plusieurs, & il nous en est resté plusieurs aussi, qui sont des monumens immortels de l'excellence de son esprit, & des rayons esclattans d'une vraye & sincere doctrine. Car il n'est point de sçavant, qui puisse nier, que ce ne fut un Philosophe tres-accomply, un Ocean de toute sorte de sciences, & un genereux Pourvoyeur; qui faisoit à tous un partage liberal des plus beaux Arts, &

des disciplines les plus exquises. Aussi est-ce de luy, comme d'une claire & seconde source, que l'essite des Medecins a puisé tout ce qu'il y a de bon en la Medecine. Mais nous luy auons sur tout cette obligation, d'avoir apporté à la vie humaine, comme un don & un present unique de Dieu, cette Rationelle, Dogmatique, vraye & legitime Methode de guerir, discontinuée par les hommes, & presque abandonnée par leur nonchalance, à faute de l'entendre; ayant long-temps demeuré cachée, ainsi que l'illustre feu de Promethée, dans l'obscurité de la Nature, & dans le profond puits de Hippocrate. Or c'est en effet & veritablement que ce mystereux Interprete des connoissances les plus secretes, a enseigné, que comme les Contraires se guerissent par les Contraires: les semblables de mesme sont conservez par les Semblables. Il desire en un vray Medecin, ce qu'il a pleinement possédé luy-mesme, comme le plus excellent Maistre de l'Art; C'est qu'il sache toutes les belles Lettres, & la Philosophie; celle sur tout, qui s'employe à rechercher, & à decouvrir les puissances occultes de la Nature; Qu'il connoisse les Principes, les Elemens, les Temperamens, l'usage des Parties; les Facultez de l'Ame, leur energie, & leurs fonctions, comme encore les causes, & les signes des maladies; qu'avec cela il entende autant qu'il se peut, les choses non naturelles; qu'il tienne comme en sa main, la nature des Indications; la force, l'usage, la vertu, & la iuste quantité des medicamens tant simples que composez. Car celui sans doute combat les yeux fermez, à la façon des Andabates, qui sans avoir une pleine connoissance de toutes ces choses, ose meschamment prendre le nom, & faire la profession de Medecin. Comme il est donc certain

tain qu'Hippocrate ce venerable & divin Vieillard, a le premier remis par ordre l'Art, ou la vertu de guerir, qu'il a mesme assorty & illustré de Preceptes, tous excellans & tres-salutaires; aussi est-il indubitable, que les ayant digerés, en suiuant la voye, la methode, & les moyens conuenables, il a mis en son iour & dans le plus haut comble de perfection, cette divine Science. Mais l'ayant fait avec vne briefveté si austere, & si resserree, qu'il a durant plusieurs siecles eu besoin d'auoir vn Interprete, qui donnât dans le fonds de ses pensées, & dont l'explication fût d'abord receüe avec applaudissement; Tel a esté sans doute, avec le meilleur droit que l'on puisse dire, Tranquille ou Serain, ce Nom de *Galien*, signifiant tous les deux ensemble. Car si vn Esprit si rare, & si clair-voyant comme estoit le sien, n'eust seruy de phare & de flambeau dans les tenebres mystiques d'Hippocrate, la race des Hommes seroit presque tout à fait privée de ce tres-ancien & incomparable bien qu'elle en a receu. A quoy pour vn plus grand comble, il a judicieusement adjousté le secret des Indications, dont la Doctrine d'Hippocrate, pour n'estre pas moins profonde que difficile à entendre, requeroit vne declaration plus exacte, & plus ouuerte. Comme donc Cesar Auguste, & le bon Prince Trajan, pour auoir reparé les Temples, & les Ouvrages publics, embellis, refaits par eux-mesmes, ne meritent pas moins de gloire, que les Fondateurs & les Architectes de ces Bastimens superbes; ainsi Galien, qui par l'esclaircissement d'Hippocrate a enrichy la Medecine, de l'addition des Indications, aussi subtile qu'ingenieuse, & tel qu'un autre Esculape envers Hippolyte, a rappellé au jour & revny ce travail espar, & qui estoit en desordre.

10 *Question de Medecine à disputer à Paris, l'an 1648.*
merite assurément que la meilleure Posterité le recon-
noisse, ainsi qu'un second Hippocrate, & qu'elle mes-
me l'honnore, le revere, & l'embrasse tendrement, com-
me l'Esculape d'Apollon, & le Thesée d'Hercule.

*a Sic fa-
tum est,
summisq;
negatum
stare diu.
Lucanus lib
1.*

O*R comme c'est vne chose fatale,
Que les plus a grands projets, & les plus importants,
Quand on les a formez, ne durent pas long-temps.*
Ainsi arriva-t'il qu'un Art si excellent, comme est
celuy de la Medecine, ayant commencé de se bien esta-
blir, ne fut pas de bien longue durée. Que si l'on en
veut sçavoir les causes interieures, elles sont deux, dont
l'une est le parler succinct d'Hippocrate, qui de soy-
mesme est assez intelligible, mais qui n'est entendu
que de peu de personnes, la plus grande part ne le pou-
vant comprendre; & l'autre, la difficulté de la chose,
qui de la mesme sorte qu'elle admet dans ses Mysteres
secrets vne vive industrie, elle rejette aussi un profond
assoupissement, & vne pesante non-chalance: car c'est
le vice des hommes, de negliger ce qui est facile, & de
s'effrayer de ce qui ne l'est pas. La vraye Medecine fut
ainsi bannie de la famille des Asclepiades, comme du
lieu de sa naissance; si bien que de sa premiere & assu-
rée demeure, elle s'est depuis fouruoyée en deux de-
stours differans. Le droit & Royal chemin, est celuy
des Rationels, non pas de ces faux Methodiques, qui
ont tout gasté; non plus que des Empiriques, qui ne
marchent que sur un pied; & voila pourquoy ce n'est
pas merveille, si comme boiteux & debiles Triacleurs,
ils sont miserablement reduits à l'aumosne. La condi-
tion de toutes les meilleures choses est telle, que celles
qui leur sont contraires, se trouvent tres-mauvaises. Le

defaut n'est point de la droite voye, mais du fouruoement, qui est d'autant plus dangereux, qu'il est esloigné davantage du grand chemin. Mais d'où vient donc cette peste? d'où cette corruption? d'une enorme & barbare ignorance, qui a pour mere & nourrice la faineantise; à laquelle s'estant assujettis les opiniastrs Methodiques, avecques les idiots & stupides Empiriques, ils ont quitté la chaste Penelope, pour s'amuser apres de vilaines servantes. Et comme pres de la salubre Parnacée,

Le mortel b *Aconit* trompe ceux qui le cueillent:

b Miseros
fallunt
aconita le-
gentes.
Virgilius 2.
Georgic.

Ainsi dans le salubre & sacré bocage de la Santé, germent & pullulent secretement des herbes malignes, & qui sont pleines de qualitez veneneuses; tellement que sous le nom & l'ombre d'*Hygie*, elles se tiennent cachées iusqu'à ce qu'elles ayent pris peu à peu leur accroissement. De cette Empirique ne se peuvent point dire Inventeurs ny *Serapion*, ny *Philinus*. Elle ne doit sa naissance qu'à soy-mesme; & dès le iour qu'elle vint au monde, à la maniere des *Aloïdes*, elle creut à une prodigieuse grandeur. Alors fortifiée d'une insolente presumption, elle reietta loin de soy la connoissance des beaux Arts; prenant en partage & en propre la seule impudence; qui tient le dessus encor aujourdhuy. Ainsi elle ose effrontément se vanter d'estre la plus ancienne de toutes. Mais que ne dis-tu plustost, ô Babilarde! que c'est l'*Experience*, de qui tu n'es proprement qu'un Avorton? Que ne t'advouës-tu defectueuse, mutilée, & tout à fait imbecille, au prix de cette Divinité tutelairre des hommes, la Medecine Rationelle. Ne sçais-tu point que de l'*Experience*, c'est à dire d'une observation attentive, & bien considerée, sont venus tous

c Hic &
Aloïdas
geminos
immania
vidi Cor-
pora. Virg.
6. Aneid.

les Arts, voire la Medecine mesme, Garde des Arts & de leurs Ouvriers. Car les Remedés ayant esté trouvez par rencontre & par vsage, dés aussi-tost qu'on les descouvrit, les Amateurs de la vraye Sagesse commencerent à s'enquerir de leurs causes; de sorte que la Raison les ayant tirez depuis de leur obscurité premiere, les a par mesme moyen aussi reduits en pratique; Et ainsi la Medecine, de Raisonnante qu'elle estoit, est devenuë Raisonnable. L'Experience donc a marché devant la Raison, ainsi qu'un voyageur qui va devant le guide qui le conduit, auquel il demande quel est le meilleur chemin, de plusieurs qui se presentent, quel celuy qu'il doit tenir, s'il doit suivre celuy qu'il tient, sans le changer, jusques à ce qu'il soit arrivé au Palais de la salutaire Hygée; s'il faut destourner, à quelle main; ou s'il est mieux d'aller toujours la mesme route jusques au bout. Ainsi l'Experience ne sachant pas où elle en estoit, a rencontré la Raison pour guide tres-assurée, avec tant de bon sucez, qu'à force de se laisser conduire & gouverner par ses ordres, elle se tire enfin des mauvais passages, & de la confusion douteuse des sentiers differens qui l'embarassoient. Qu'à l'Experience s'attribuë doncques l'invention de guerir par un cas fortuit, pourveu qu'on advoüe, que c'est la Raison qui la redresse, & qui la conduit. Aussi est elle pour ce mesme effet plus iustement appellée, *Observatrice*, ou *Surveillante*, & *Memoratrice*; que cette non-chalante & aveugle-*Experience*, avec tout son concours de symptomes. Mais sans les auspices de la Raison, il est d'elle comme des yeux ouverts dans les espaisse tenebres, au milieu desquelles quelque effort qu'ils fassent, il leur est impossible de rien voir, si la lumiere

miere venant d'ailleurs, ne leur en donne le moyen. Ces concours seuls estoient tout l'appuy des Empiriques: ils n'avoient point de meilleur soustien, ny de conducteur plus assuré: & comme les Quinze-vingt de Paris ont leur baston pour guide, pour œil & pour Soleil; ainsi s'estoient-ils mis dans l'esprit, que par le moyen de ce concours, ils pouvoient avec certitude estre conduits à la connoissance, au presage, & à la guarison de la maladie. Quant à ses causes, ils ne s'en mettoient nullement en peine, n'estant pas question, disoient-ils, de rechercher ce qui fait la maladie, mais de sçavoir ce qui l'oste: Pour cela mesme, ils avoient trois rangs, ou trois divers ordres d'apprendre la Medecine, l'*Autopsie*, ou ce qui paroist à l'œil, l'histoire connue, & l'adresse de passer du semblable au semblable. Mais le hasard n'a point de commerce avec la Prudence; & ce qui n'est point bien advisé, n'est point seur aussi. Car qu'y peut-il avoir d'assuré en cette diversité de constitutions particulieres, & dans cette immense & infinie estendue du propre & particulier temperament d'un chacun?

Quel moyen de lier vn si changeant d'Prothée?

*d quo te-
neam vul-
tus inuan-
tem Pro-
thea nodo?
Horat. lib.
i. epist. 1.*

A quelles illusions de songes trompeurs ne s'aheurent-ils pas? Ne sont-ce point les mesmes causes, qui font leur Histoire; & son Imitation incertaine & mal-fondée; comme celle qui mesure trop souvent la coudée à la toise, & la toise à la coudée? En effet, n'est-il pas vray, que suivant les divers sujets, diverses sont aussi les causes des maladies; diverse la condition des sujets, diverse la constitution; & qu'au reste, souvent ce passage est aurant du semblable au semblable, que du blanc au noir, & du noir au blanc? Se fait-il aux parties? il est mal-seur; aux maladies? il est trompeur: aux reme-

des? il est meurtrier. Ceux qui par le concours des sym-
ptomes, rendoient à des buts douteux & si muables, ne
les frapportoient pas mieux, que feroit celuy qui pour sui-
vroit e des corbeaux

e qui pas-
sim se qui
tur corvos
testaque.
lutoque.

A grands coups de cailloux & de moites de terre.

Ce choc aussi, comme celuy des gens de guerre dans
la meslée, ne sçauroit estre que funeste & mortel, en-
ce qu'il abuse les mal-advisez, les trop credules, & les
peu sçavans. D'ailleurs, qui sera le Sage, qui voudra se
fier à vne observation toute seule, & ne l'appliquer pas
à la recherche de la Raison? Mais ces perilleux faiseurs
d'essais passioient bien plus outre, puis qu'ils mesprisoient
la science de l'*Anatomie*, c'est à dire le fil d'Ariadne
dans le labyrinthe de la Medecine, dont les sentiers em-
barrassez, & se perdans l'un dans l'autre, rendoient la
sortie hors de ces destours extremement difficile. De-
quoy neantmoins il ne falloit pas beaucoup s'estonner,
veu qu'ils renonçoient à la Raison mesme, par qui nous
sommes veritablement Hommes, & Medecins. Ils s'ar-
rachoient les yeux, afin de voir plus clair (ce qui m'est
vne merveille bien estrange) du moins, pour ce mesme
effet ils esteignoient les flambeaux, au milieu des tene-
bres les plus obscures. Que ces Maistres Fourbes gar-
dent donc pour eux leurs invtiles essais, & leurs trop dan-
gereuses elpreuves. Quant à la Methodique, de quel
auteur, ie vous prie, se pique-t'elle de tirer gloire? N'est-
ce pas de *Themison*, ce noble Charlatan de Syrie; cet
Impositeur plus pernicieux qu'une mauvaise Automne,
& plus contagieux à Rome, que ne fut jamais la Peste?
Ce pipeur illustre, par nouvelle demangeaison d'innover,
& d'imposer au monde, composa la Methodique,
de la mesme sorte que les araignées forment leurs toiles;

Personnage au reste, plus ambicieux & plus obstiné que ne furent jamais tous les Empiriques ensemble. Car combien tesmoigne-t'il d'estre arrogant, par le nom mesme qu'ils s'attribuë? Combien effronté à reprendre Hippocrate? Et combien temeraire encor en la profession qu'il fait, d'enseigner en six mois la Medecine, quoy que ce soit vn Art si long, que la vie la plus longue peut à peine suffire à le bien apprendre? Voyla pourquoy il ne s'arrestoit ny à la cause de la maladie, ny à l'endroit où estoit le mal, ny aux forces du malade, ny à pas vne des autres circonstances les plus solennelles, où s'attache religieusement cette divine Science, à cause qu'il se vantoit impudemment, d'avoir trouvé vn abregé de la Medecine, ou pour mieux dire, vn abregé de la vie. Or quelques grandes que fussent toutes ses promesses, il ne faloit pas estimer moindres celles de l'impertinent *f de Thef-* Frippon *f Theffalus*, qui abjura si fort toute honte, que *falo vide* des peignes & des outils de cardeur, il passa soudain, ou *Galen. lib. 1. methodi medendi.* se le fit accroire, aux marques d'honneur de la Medecine, & devint tout à coup cygne, c'est à dire Poëte, de corbeau qu'il estoit auparavant. Tellement que ce n'est pas sans cause, qu'afin de chastier ce Thrason, *Galien* se sert contre luy & du foïet & des estrivieres, iusques là mesmes qu'il semble quelquefois oublier son nom, & en changer la douceur en severité, à force de le gourmander, & de tenir en bride cet animal indomptable, & trop fort en bouche. Ils serrent & laschent, disent-ils, comme bon leur semble, ou mesmes ils inventent ie ne sçay quoy de melle de tous les deux: & cependant ils vous mortifioient le Miserable qui s'estoit donné à peigner, & à carder à ces Ouvriers, d'une maceration, ou d'un ieusne de troisiours, & le plus souvent d'une eternelle

inedie, qui leur estoit comme vne peste Diatritaire. Ces rigoüreux Peres de famine ne penetroient point dans les choses cachées, & faisoient comme s'ils eussent voulu jouer du Luth sans chordes; En quoy, certes, comme en toute autre chose ils estoient peu clair-voyans, de ne pouuoir connoistre que l'experience requiert le secours de la raison; & ne se tient jamais assurée, si elle n'a cette guide avecque foy: La raison aussi consulte l'Experience, qu'elle fortifie; & comme ses rapports sont fideles, c'est sans difficulté qu'elle y adioust foy. Elles s'entretiennent ainsi dans vne amour mutuelle: la main ayde la main: les pieds s'entresuivent; & vous ne sçauriez sans incommodité, les separer l'un de l'autre. Il faut donc, que comme l'Ameregite le corps; la raison de mesme gouverne l'experience. Celuy se pourra dire medecin, qui connoistra les parties malades, l'âge, l'air, le lieu, les saisons: qui en *Hippocrate* sera vn *Gray Galien*, & en toute maladie vn autre *Hippocrate*.

PAR les travaux de *Galien*, comme par ceux d'un second *Hercule*, & par sa divine Methode, ayant esté reprimée, & renduë calme cette double peste de la plus sainte, & la plus veritable Medecine, l'Art de guerir, ou la guerison mesme fondée & prescrite par Hippocrate, reprit vne nouvelle vie, éclairant le monde d'une tres-vive lumiere. Elle subsista dans cette vigueur, durant le temps que la politesse des belles Lettres fut en estime, & qu'après *Galien*, ces heurcuses restes de la vraye Grece, & du meilleur âge, *Arétée*, *Oribase*, *Aëce*, *Paul*, *Alexandre*, & les autres, prirent le soin de la maintenir, de la defendre, & de l'illustrer. Ainsi tant qu'après la course, ils se baillerent entr'eux

tr'eux de main en main ce flambeau, & qu'il se trouva des gens pour le recevoir; elle fut en grand credit par l'autorité de ces excellens Hommes, & se fit aussi valloir beaucoup par la recommandation, & par le suffrage de la Santé. Mais enfin, il arriva peu à peu, qu'un âge pire, plus grossier, & moins esclattant, degenera par je nescay quel destin, non pas du prix de l'or en la blancheur de l'argent, ou en la splendeur de l'airain, mais en la rouille & en la rudesse d'un fer inutile entierement caché sous la terre. Car cette horrible barbarie, où se trouva jointe vne deforme ignorance, s'empara de ces miserables siecles; apres que des tenebres plus que Cimmeriennes eurent offusqué, ou mesme estouffé la vive lumiere de la verité; d'où il advint que les bonnes Lettres estant bannies, & comme arrachées de sa compagnie, on vit toutes en desordre & en alarme les pauvres Muses, parmy la troupe desquelles elle est toujours en son lustre, & en assurance. Au milieu de ces tenebres des beaux Arts, & dans cette noire nuit, qui est le temps le plus favorable aux voleurs, pour prendre l'occasion de vous saisir d'elle;

a Arabes vagabons, n'estes-vous pas venus

Habiter nos climats, sans les avoir connus?

*Ignotum
vobis A-
rabes ve-
nistis in
orbem.
LUCANUS
lib.3.*

Mais qu'avez-vous de commun avecque l'elegance des Grecs? Par vous a esté souillée la meilleure Philosophie; & confusément broüillée avecque la pureté de la Medecine, vous mesmes l'avez infectée, Empoisonneurs trois fois plus venimeux que le poison mesme, & triples larrons? Comment donc estes-vous si hardis, que de vous emparer du sacré nom de la vraye Medecine, qui vous a tant en horreur? car c'est par raison, & suivant la droite voye qu'on la voit proceder en tout son

ouvrage, qu'elle acheve avecque peu de remedes, mais esprouvés, & tous bien choisis. D'ailleurs elle n'est pas moins chaste que sobre; & ne peut sans aversion ouïr parler d'une trop grande quantité de drogues toutes invtiles, & superflües. Comme en effet, tous ces beaux fatras de mille remedes veneneux, à quoy servent-ils qu'à vendre la mort bien cherement? car ils n'y conduisent point par des moyens simples, mais composez, & qui se prestent leurs forces, afin que de cette forte, une peste en arme une autre. La mort se vend par eux & chez eux, sans qu'ils manquent jamais d'acheteurs. Le venin y est ouvertement estallé, comme quelque precieuse marchandise. Celuy qui le vend, le livre impunément; mais impunément ne le reçoit, le malheureux qui l'achete, bien qu'il luy couste beaucoup. D'où il se voit assez, qu'autant que la medecine se sert avec précaution & religieusement de la Nature des choses, pour la commune conservation des mortels, autant impudemment en abuse pour ses interets, cette Charlatane, suborneuse, attrayante, maquignonne & fausse vendeuse de bagatelles, & de happe-lourdes; dont les merceries & les denrées sont aussi mauvaises, que sa profession est insolente. Car apres tout, elle ne consiste qu'en une copieuse suite de noms, ou de remedes vains; & quoy que par eux elle ne combatte nullement les maladies, elle s'en vante neantmoins, & fait comme ces passe-volans, qui dans une armée, où ils ne servent que de nombre, sont si effrontez, que de se dire Soldats, encore qu'ils n'aillent jamais aux coups. Certes, l'audace de ces Escrocs à mesler ensemble les poisons, n'est pas moindre, qu'à leur imposer des noms estranges, tels que sont les Phlegmagogues, les Cholagogues, les Ce-

phaliques, les Bechiques, les Cardiaques, les Bezoar-
diques, les Lithonriptiques, les Specifiques, & ainsi
d'une infinité d'autres semblables par eux inventez,
pour abuser le peuple ignorant. Que s'il en est fait men-
tion dans les elegans ouvrages des plus doctes, & des
plus polis d'entre les Grecs, c'est pour les auoir reconnus
par vsage, & mesme éprouvez par raison; & non pas
comme ces pestes venales, ces merciers & ces Estalleurs
de mal-encontres, qui par vne aveugle & précipitée avi-
dité de gagner, les ont laschement prostitués. Ces Bar-
bares encor ont bien osé condamner aux mines, cette
pure & innocente Vierge, la medecine; iis l'ont com-
me abandonnée en des lieux souterreins, pour y tra-
vailler aux metaux, & tirer d'eux ou des secrets profon-
dement cachez dans leurs veines, ce qui n'estant veu,
ny sceu de personne, est, comme il doit estre, plus uti-
lement couvert que descouvert. C'est vne verité ge-
neralement connuë & reverée des Sages, que tout ce
qui naist par tout, naist pour l'homme, par vne grace
particuliere que luy a faite le grand & souuerain Pere
de famille: Et à vray dire, comme il a formé l'homme
pour foy, aussi est-il vray qu'il a tout créé pour le bien
de l'homme; & qu'au mesme lieu où il l'a fait naistre,
il luy a mis en main vne bien-heureuse abondance de
toutes commoditez, pour l'apprester à son vsage, avec
vn soin vigilant, & vne adresse industrieuse. De cette
abondance déjà toute acquise, & à qui rien ne manquoit,
qui luy pût estre utile; ou si vous voulez, de cet vsage
voisin & domestique des choses necessaires, la convoi-
tise d'autrui, & la leur en a destourné plusieurs, iusques
à les transporter comme hors d'eux-mesmes, à des se-
cours estrangers, & tout à fait inconnus. En quel cli-

mat donc, & en quel pais, quelque reculé qu'il soit, ne courent-ils point par mer & par terre, après ces précieux perils, qui leur sont si chers? On leur apporte d'un autre monde, ce qui les tuë dans leurs maisons;

b Totoque
exquirieur
orbe, quo
gens qua-
que perit.

b *Et par tout l'Univers pour eux on va querir,*

Ce qui fait tant de maux, & tant d'hommes mourir.

Ainsi à moins que d'estre Prince, & d'avoir de quoy fournir à cette horrible despenſe de remedes, l'on ne ſçauroit heureuſement guerir d'une maladie. Mais ce n'eſt non plus à la Fortune qu'à la Puiſſance, & aux immenſes richesses que la medecine eſt aſſervie. C'eſt à l'Humanité ſeule, qui fait qu'elle ſ'eſtudie ſur toutes choſes à n'eſtre point ſomptueuſe, ny à charge aux malades: comme encor à vivre ſobrement, ſans aucune profuſion, & à guerir par des remedes qui ſoient auſſi faciles à preparer, qu'à trouver. Si la pierre d'azur vous manque, & ſi ſa racleure & ſa pouſſiere ne ſe vendent au mot du précieux Trompeur, qui eſt de meſme cabale que le Foſſoyeur qui enterre les corps, c'eſt fait de vous, & de voſtre vie. Ces impoſteurs ſ'entendent ſi bien enſemble, qu'il en faut paſſer par où ils veulent. Si vous n'achetez donc pas (& deuſſiez-vous vendre ou engager corps & biens) cet Ambre qu'ils vous vantent ſi fort, quoy qu'il ne ſoit que le vomifſement de la mer, ou de ſes monſtres; ces perles ſi recherchées, excremens qui ſ'attachent aux conques; & ce petit os qui ſe trouve à ce qu'ils diſent, dans le cœur du cerf; vous voilà conſiſqué, il faut deſloger au convoi, à l'enterrement! Que le ſimple peuple ſe peut dire heureux en ſa pauvrete, d'eſtre à couvert des impoſtures de ces fourbes, & pluſt à Dieu qu'il le ſoit auſſi de toutes leurs autres malices. Ils ſ'entredonnent à rire, de la trop facile credulité de

lité de ces Riches, dont ils ont fait leurs chalands, à cause de leur opulence. Ils se joüent des plus grands, des mediocres, & des plus petits, par leurs magnifiques prestiges de promesses & de tromperies. Voila donc comme de cette fondriere d'ignorance est sortie à gros boüillons, cette effroyable vermine de remedes sans remedes; voyla, dis-je, comme de cette source si feconde en ruïnes, s'escoulent tous les maux qui affligent le public. Tellement qu'en cette foule & en ce ravage, bien à peine se peut faire ouïr la vraye doctrine d'Hippocrate, qui ne donne pas seulement la Santé, mais qui la conserve; Doctrine connuë de peu de gens, & qui ordonne aussi peu de remedes, tous vrais neantmoins, & tres-excellens. Or je veux quel'on endure tant qu'on voudra, que les Arabes soient des Voleurs & des Pirates de terre, qu'en esclaves eschappez vne saillie fanatique ait poussez de fureur dans la Medecine: Mais qui pourra souffrir que ces Pille-bourses insultent si temeraiement sur le plus honorable de tous les Arts? Qu'avec vne petulance effrenée, ils fassent degast dans son pais, & qu'en Brigans forcenez, ils frappent, ils blessent & couppent mesme la gorge à la plupart du monde? Ce sont eux en effet, qui en ont conspiré la ruïne, eux qui sont ennemis jurez du genre humain, eux qui authorisent leur vanité, d'un specieux nom Grec, dont ils se qualifient à faux titre: Car ils se nomment *Chymiques*, bien qu'ils deussent plustost s'appeller *Chimeriques*, & en Arabe corrompu, puis qu'aussi bien ce n'est d'eux que corruption, & que pourriture, *Alchymistes*, ou Maistres ouvriers d'*Alchymie*, qui est passée en terme commun pour fausse monnoye, & mystereux Professeurs d'ignorance. L'etymologie en peut encor estre tirée d'une autre

bien lourde barbarie de noms, n'estant en effet que de barbares *Spagyrics*: A quoy s'ils adioustoient vne lettre, ils trouveroient *Spargyrics*, ou tireurs d'argent: Opérateurs ridicules, qui ont pour tout thresor, des charbons; pour raison, vn fourneau, pour estude l'usage des cendres, & pour methode, l'impudence. Quel bon effet peut produire leur mestier infame, ce dangereux Boute-feu, cet Incendiaire, & ce Coupe-gorge, qui n'a pour Inventeur & pour Auteur qu'un *Paracelse*, ce larcon public, & ce chaste-troupeau d'Hippocrate, comme *Cacus* le fut autresfois d'*Hercule*.

*o Illius a
tros Ore
vomens i-
gnes ma-
gnâ se mo-
le ferebat.*

c *Ce noir Fils de Vulcan, ce monstre au vaste corps,*

Quels tourbillons de feu ne pouffoit-il dehors?

*d de Para-
celso, ejus
scriptis,
moribus,
vita &
morte, vi-
de Thom.
Erastum
quatuor li-
bris, in
quibus cõ-
futavit no-
vam medi-
cinam Pa-
racelsi:
Raymun-
dum Min-
dererum,
in Thren-
dia Medica.
Melchio-
rem Ada-
mam in vi-*

d Mais comme le maistre des Forgerons estoit son pere, la Presomption de mesme, maistresse de l'ignorance se pouuoit dire sa mere, l'Impudence, sa nourrice, l'yvrognerie sa cõpagne inseparable, l'obscurité sa guide, le cabaret sa maison, & la mendicité tout son revenu. Car à la fin, ce dernier Ouvrier de mal-heur, qui n'estoit rien moins que Medecin, ne fut aussi à son domage que trop veritable mendiant. Ce n'est donc pas luy faire vne iniure, que de l'appeller Coquin, ennemy & massacreur public; si depourueu de la connoissance des Lettres Grecques & Latines; c'est à dire, de toute liberale doctrine, que pour debiter ses prodigieuses reueries, il luy falloit vn devin & vn interprete, qui publiast en Latin les extravagances & les chimeres qui luy troubloient le cerveau, parmy le vin & l'yvrognerie. L'ancienne & sincere Medecine commençoit depuis peu à renaistre, avecque les belles disciplines; quand ce tenebreux Artisan l'attaqua premierement par mines en traistre, puis en assassin, avec le fer & la flamme. Il

se mit à faire profession d'une Hermetique par luy forgée, directement contraire à la Medecine; & ce terrible remueur de cendres, se prit à souffler à perte d'haleine, pour dissiper, s'il pouvoit, la sage conduite d'Hippocrate: ce qu'il fit encor, afin de regner impérieusement parmy son charbon, en vray vendeur de fumée. De ces cendres il en tire de nouveaux principes de son art tout nouveau, pour en faire l'establissement. Il rejette les Elemens des Sages Dogmatiques: il basoüe l'Anatomie: il rebute la connoissance des Temperaments; & l'intemperé broüillon ose la nommer Sujet, comme ces vieux eschaudeurs de Thessalie. S'agit-il du Prognostic des malades? il y est entierement aveugle. Quant au *Diagnostic*, ou à leur connoissance, il n'y entend rien, ny en la cure par consequent, & ce n'est pas une bien grande merveille. Apres cela, que peut-il estre qu'un Esgorgeur à outrance, qui se vante d'oster le semblable par le semblable, c'est à dire, d'esteindre le feu par le feu, & de secher l'eau avecque l'eau. C'est en un mot, adjouster mal sur mal pour remede, & guerir comme fait le Bourreau, par une dernière violence. Pour ce qui est de la Diete, ou du Regime de viure, véritable & infaillible moyen de la haute Sageſſe, & de la droite Medecine, il n'en veut point ouïr parler: Au contraire, il la rejette bien loin, l'insatiable glouton qu'il est, & n'a pas moins d'aversiō pour elle, qu'en a pour l'eau l'Hydrophobe. Ce sont les vanitez que se donne cet audacieux & importun Fanfaron, qui ne cesse de publier insolemment, qu'autre que luy ne tient le sceptre de tous les Arts liberaux, bien qu'il n'en sceust pas un seul, & qu'il n'en eust aucune teinture. Il se vante encore, d'estre Monarque des Secrets, & l'est en effet; j'entends de

tu Germa-
norum Me-
dicorum.

Danielern
Sénertum
in libro de
cōsensu chy-
micorū cum
Galenicū.

Germanū
Courtin

Medicum
Parisiensē
tractatu pro-

prio. Ioan-
nem Frei-
tagium, in

notislibus me-
dicū. Me-
rindoliurn

in Physio-
logia.

ceux qui le doivent estre pour iamais: & au lieu de voir le jour, demeurer ensevelis avecque leurs Autheurs, dans la profonde nuit de l'oubly, & du silence. Mais cette fatale malignité gagna le dessus, pource que les fous & les meschans, dont le nombre est sans comparaison plus grand que celuy des Sages & des gens de bien, ayment mieux vieillir dans le mensonge, que de reconnoistre la verité, qui est le principe & la source d'une bonne vie. Qu'on ne s'estonne donc point qu'un si grand fourbe, ait en son erreur une infinité de gens de sa Secte, qui dans la licence du siecle, & sous l'adveu de la folle ignorance des hommes, pillent & volent plus impunément, que les bons ne s'estudient à bien faire. De-là leur vient cette effronterie, dont ils animent leurs vains prologues, quand de leur infame eschaffaut ils mettent en vente leur *Laudanum*, qui est l'*Opium* préparé, mais qui ne sçauroit l'estre si bien, qu'il ne soit toujours plus mal-faisant, & moins seur, que n'est l'*Opium* pur & simple, comme ne perdant jamais son venin, qu'il augmente plustost par la preparation qui en est faite. I'obmets l'or en fucille, apres lequel ils béent avidement, l'argent qu'ils falsifient, les perles qu'ils se vantent de fondre, pour en accroitre leur fonds, leur antimoine, qui signifie, contraire à la vie, dont il est effectivement mortel ennemy; leur mercure, ou argent vif, venin tres-subtil, & tres-penetrant; leur vitriol, ou leur couperose, qu'ils feroient mieux de laisser aux corroyeurs, que d'en vler comme d'un coupe-gorge. Voila quelles sont les Drogues par le moyen desquelles ces mal-honnestes suivans, inhabiles, & temeraires Partisans de ce virulent & violent Operateur, guerissent les maux avec autant de certitude, & aussi veritablement,
comme

comme il est vray que leur Maistre avoit trouvé l'Art de faire de l'or; il se le faisoit accroire néanmoins, bié qu'il n'eust pas valant vne obole; Et de plus, il promettoit assurément aux autres vne vie de plus d'un siecle, luy qu'une mort, qui ne fut ny hastée, ny avancée, quoy qu'il le meritaist bien, mais trop tardive, estouffa dans vn Hospital public en la quarante-fixiesme de ses années; De sorte qu'ainsi mourut,

Au grand soulagement de la terre & du Ciel,
ce pretendu faiseur d'or, & cet exterminateur imaginaire de toute sorte de maladies. Mais plus tragique encor, & plus digne de leur vie criminelle & infame, a esté la fin d'un nombre presque infiny de sa Secte; ausquels comme à des Pestes publiques, à de faux monnoyeurs, & à de malheureux faiseurs d'Alchymie, par vne bonne & droite justice, on a fait perdre sur vn gibet, la respiration & le soufflé de la vie. Je ne souhaite pas à leurs semblables ce mesme destin, mais seulement, qu'ils s'amendent, & à ceux qui leur adjoustent foy, plus de bon sens, & moins de credulité.

MAIS de tant de monstres de sectes diverses s'est magnifiquement renduë victorieuse cette vraye & droite Raison, ou cette puissante Verité; à bon droit appellée fille du Ciel; & la majesté de la doctrine d'Hippocrate ayant combattu ces horribles prodiges d'opinions, non pas en vne seule bataille, ny en vn siecle seul; enfin la Maistresse & la plus forte.

A mis au jour ses beautez adorables.

Elle a dissipé l'air tenebreux, & les broüillards des Arabes, escarté bien loin leurs vapeurs espais, & pur-

g   leurs immondicibles ; car elle m  me y faisant entrer, c  me fit jadis Alcide dans les   tables d'Aug  e, son trefpur Alph  e ; par le courant de ses eaux claires & nettes s'est descharg  e de ces impuretez , avec non moins de travail qu'en eut l'invincible Hercule ,    nettoyer ce vilain cloaque, d'un tas d'ordures qui s'y estoient ramass  es. Dequoy certes elle est heureusement venue    bout par l'ineffimable labeur de ces Heros Dogmatiques, qui sous la conduite d'Hippocrate leur Chef, & de Galien, son second, eslevez en leur Eschole, & instruits dans leurs sages & genereuses Maximes, ont assailliy & forc   l'abus dans ses retranchemens. Mais ils ont bien fait encore plus , & sont montez iusques aux sources inconnu  es de ce sacr   Nil, guidez par Galien, qui penetra si avant par l'admirable vivacit   de son esprit, & par vne magnanime perseverance. Ce qu'il n'eut pas plutost fait, qu'   la faveur de ce grand Fleuve, dont il se mit    suivre le fil, il entra par les sept bouches dans le vaste & profond Ocean de la plus salutaire de toutes les sciences. Ainsi cette Raison auguste & sacr  e s'estant rang  e souz les enseignes du premier qui est son Ma  tre, & son Prince ; & souz les ordres aussi du second, qui la defend, & la protege, s'est jointe    l'Experience sa compagne, pour la gouverner, mais non pas pour s'abandonner    sa conduite. Elle a pour moyens toutes les forces de la Nature, des thresors de laquelle il est en sa puissance de disposer. Quant    sa profession, qu'elle m  me expose au iour : c'est vne science evidente, certaine & necessaire, o   neantmoins elle parvient    force de coniectures, & de bien prendre ses vis  es ; car elle peut tous les deux ensemble, & par leur moyen frapper droit au but. Le Sage Medecin ainsi entour   de l'eslite

de tous les beaux Arts, qui luy font escorte, ne sera point autrement nommé des Hommes, que le fut autrefois de l'oracle, le sage Legislateur Lycurgue. Car l'Anatomie est comme vn tres-clair flambeau porté devant luy, pour luy faire descouvrir les parties malades. Elle l'esclaire si bien, qu'en quelque maladie que ce soit, elle luy fait voir comme avec des yeux de Lynx les maux cachez, qu'il aperçoit par leurs propres signes, & par la force de l'Art, en met les causes en evidence. Par son moyen il discerne les dissemblances des semblables; & les ressemblances des dissemblables: Il distingue les forces debiles & languissantes, des oprimées & abatuës; la Pleuresie droite d'avec l'Inflammation du Foye; l'Apoplexie, de la Syncope; la Colique, de la Nephritique; vne Phthisie, de l'autre; les petites Veroles imminentes & eminentes, des Rougeoles; la suffocation Hysterique, de la vraye Syncope; la Cataphore, de la Lethargie, & la grosse Verole, du Rheumatisme. Et toutes-fois au discernement de tous ces maux, combien voit-on se tropser souvent ceux mesmes qu'on ne tiét pas des moins versez en la Medecine? Ques'il faut venir maintenant à toutes les maladies en general, avec combien d'adresse & de viuacité ne les descouvre point celuy qui les voit de tous les deux yeux, plus veritablement, & avec moins de vanité, que les Sinois ne disent d'eux-mesmes? Il examine & prend garde, si ce ne sont point des maladies Endemiennes, ou Epidemiques, ou pestilentes, & s'il n'y a pas quelque chose de *b* divin, c'est à dire, selon le sentiment d'Hippocrate, quelque constitution del'air, qui environne les corps, changée & corrompue par la permission divine. A-t'il reconnu la maladie? Il court soudainement à la cure, où il travaille en ou-

b In illis
dicitur de-
litescat?
Hippocr. 1.
Prognostic.
& Gal. in
Comment.

28 *Question de Medecine à disputer à Paris l'an 1648.*
 vrier habile, prompt, secourable, & qui se fait fort de la
 Methode generale, comme d'un arsenal tres-bien pour-
 veu de toute sorte d'armes, & de munitions de guerres;
 Aquoy il faut adjouster, qu'à ses portes est continuel-
 lement en garde, l'intelligence parfaite des Indications;
 singuliere inspiration de Dieu octroyée à cet vnique &
 admirable Interprete, le Phare des Dogmatiques, leur
 grande & leur petite Ourse.

*Telle c que vers le Ciel elle est considerée
 Des Phenices voguant sur le dos de Nérée.*

e Quâ si-
 dunt duce
 nocturnâ
 Phœnices
 in alto.

Mais il est certain qu'à cette celeste Cynosure n'ont
 jamais eslevé leur veüe ny ces non-chalans *Empiri-
 ques*, non plus que ces autres insensés qui s'appellent
Methodiques, sans avoir presque jamais oüy parler de me-
 thode; Ces Prodiges, qui mettent tout à la cuisson, &
 ces Maistres charbonniers du fourneau de Paracelse, qui
 transforment le blanc en noir, Broüillons à deux faces,
 qui pour le droit & le vray, prennent le gauche & le faux:
 pour l'industrie & la bonne foy, la fraude & la fourber-
 rie: pour la lumiere les tenebres; & vrais Ixions, embras-
 sent vne nuë au lieu de Iunon. C'en'est pas ainsi qu'en
 use le sage Medecin, comme imitateur qu'il est d'Hip-
 pocrate. Il applique d'aux maladies les remedes, qui
 leur sont propres & convenables; comme, par exemple,
 y a-t'il Plethore ou Repletion, qui tiennent les parties ten-
 dues? Il ouvre la Veine, & va ainsi au devant de quan-
 tité d'autres maux, car par le moyen d'un secours si
 prompt & si favorable il arreste toute sorte de fluxions;
 Il tranche net les fievres meurtrieres; Il dompte la ma-
 lignité des Pestilentes; Il rappelle le sommeil, cet offi-
 cieux amy de la Nature: il adoucit l'amertume des dou-
 leurs: il esteint la violence des inflammations: il resta-
 blit.

d opportu-
 nissimo re-
 medio
 Phleboto-
 miâ occur-
 rit. Gal. li.
 de cur. rat.
 per sangui-
 nis missionem.

blit en leur entier, mieux que pas vn autre remede, quelque puissant qu'il soit, ny qu'aucune poudre Chymique, qui s'attachant aux parties, ne fait que les miner: ny que nul vin vomitif d'antimoine, vray fiel de l'enfer: les pauvres Apoplectiques, victimes fatales de Pluton, la vie desquels ne tient qu'à vn filet, encor est-il extremement delié: il rend la respiration à ceux qui sont sur le point d'estre estouffez d'une Esquinancie; Et fortifié de la Raison, sa Maistresse & sa Reine, il exterminé l'Hydropisie presque formée, & qui s'insinuë mesme d'une cause froide. Quoy plus? Il fait desloger des pieds & des mains la vraye engeance de la mollesse & du luxe, vulgairement appellée Goutte, & cela plus puissamment que ne font ensemble toutes les huiles Chymiques. Par mesme moyen il destourne le flux des Hemorrhoides; reprime la Dysenterie; & attire au dehors les Varioles, revêches à sortir; (maux inconnus aux anciens;) corrige la malignité de la Rougeole, & en garantit les Poumons; remédie à toute sorte d'intemperies, débouche les obstructions, restablit le corps dans vne vigueur souble, & luy rend la liberté de toutes ses fonctions ordinaires, au grand profit de la vie, qu'elle comble de bonheur, & de commoditez infinies. C'est le vray Nepenthe; c'est la salutaire Panacée, qu'il ne reserve point seulement pour soy, mais il en fait part à toute la race des Hommes, à laquelle il se doit soy-mesme: Car c'est en la vraie & saine Methode qu'est le souverain Alexitere, & le Fort imprenable des Remedes qui meritent le titre de Princes & de Souverains sur tous les autres. Mais s'il ne s'y trouve aucun concours de Plethore, que faudra-t'il que fasse en tel cas nostre Medecin? Qu'il mette en Dieu; puis en soy, comme sage qu'il est, toute

son attente, & tout son appuy; Apres cela, qu'il suive comme à la trace, les Indications les plus pressantes, dont il prendra loy & ordre d'agir. Que si dans les Veines il y a Cacochymie, c'est à dire, vne secreete malignité d'humeurs peccantes respenduës dans les vaisseaux; ou si les maladies prennent leur source & leur cause, d'une pourriture renfermée, soit qu'il les faille estimer Fiévreuses, Rhevmatiques, ou Catarrhoïques; soit qu'il y ait des vlceres formez, ou sur le point de l'estre, ou si les playes sont profondes: qu'alors il ouvre hardiment la Veine, & qu'à proportion des forces du malade, il le traite le mieux qu'il se pourra. Que s'il advient qu'un malicieux amas d'humeurs impures se soit logé hors des veines, comme aux cavitez du Foye, au Pancreas, ou au Mesentere, que l'on peut nommer avec raison le Nourricier de l'employ mercenaire; ou mesme au Cerveau, aux Membres, & en toute l'habitude du Corps, il pourra passer de la Saignée à un autre grand secours; qui est la Purgation, bien & deuëment administrée; estant e l'expulsion de l'humeur peccante, vicieuse, & nuisible en qualité: outre qu'elle la corrige, elle acheue encore ce qui reste à faire: car elle nettoye ce qu'il y a d'excremens superflus; elle desbouche les obstructions, & fortifie ce qu'elle trouve de foible. Mais il le faut faire à propos, & bien prendre son temps, ce qui est le chef-d'œuvre de l'Art, & de la suffisance requise; Que si quelqu'un en use autrement, contre la saison & l'opportunité, il connoistra par espreuve, le voleur, le bourreau, le meurtrier, qu'il aura non seulement empoisonné, mais esgorgé son malade; au lieu qu'un bon Medecin, s'il se fût mis entre ses mains, l'eut comme ressuscité de mort à vie. Admirable puissance & necessité

e Vitiosi
& qualita-
te noxij
humoris
detractio.
*Galen. in
Apher.*

de l'Occasion! sans elle la Medecine qu'est-elle autre chose qu'occision, s'il faut vser de ce terme? car comme elle se peut dire le chef de toute action, aussi est-elle f l'ame de tout le secours de cet Art incomparable. Celly que vous honnoreriez d'un si haut titre, ne prevendra, n'anticipera, & ne laissera passer ce moment salutaire, qui pour venir à bout de son dessein, & satisfaire au desir du malade, appelle à son ayde tous ses moyens, monte tous ses ressorts, & joint toutes ses forces ensemble. Parmi un grand nombre de medicamens, il choisit & met à part ceux auxquels il iuge que la violence du mal sera contrainte de ceder; à sçavoir, de plusieurs, une petite quantité, & de ce nombre les plus assurez, ou les plus certains & les plus exquis encore de cette eslite. Quiconque sçaura, & pourra ce que ie viens de dire, qu'il soit tenu pour Medecin, & qu'aucun autre ne soit si hardy que d'en vsurper le tiltre. Car à quoy peut servir cette foule de remedes qui ne font qu'esmouvoir les humeurs, sans rien avancer, & qui en les irritant à leur dommage, irritent aussi la bonne santé, par le mauvais effet qu'elles produisent? Quoy? nostre Medecin sage & habile fera-t'il fleche de tout bois? & fera-t'il dit de luy, que sans choix ny distinction, il employe pelle-mesle tous ces Purgatifs, qui sont ordinairement en la bouche du menu peuple? Rien moins; Au contraire,

g *le veulx mal, dira-t'il, au profane vulgaire, &c.*

Il sera Homme d'eslite, comme ses Remedes, dont il aura toujours en main les meilleurs des meilleurs, & les plus approuvez des mieux choisis; & bien assure de son baston, sans vser de tant de sortes d'armes, il mettra les ennemis en fuite, se donnera la victoire par un prompt secours, & gagnera luy-mesme l'honneur du

f Medici
auxilii ani
ma est.
Hippocr. in
Epiſt.

g Odi pro-
fanū vul-
gus, & ar-
cco. Horat.

Triomphe. Ainsi ce Defenseur de Nature connoistra tout à fait le genie de ces Purgatifs, puis le temperament & la constitution de ceux qui en doivent user. Alors ayant premierement esteint l'inflammation des parties, il prendra le soin d'en balier les cendres, & d'en escarter bien loin toutes les restes. Pour en venir à bout selon son desir, il ne sera nullement besoin ny qu'il se transporte aux derniers confins de l'Ethiopie, ny qu'il voyage en la Colchide, ny qu'il s'en aille chercher par mer & par terre au Royaume du Pont, en Espagne, aux Indes, ce que produisent ces païs-la, si fameux & si fertiles en venins. Il ne se desfiera pas à tel point de la Bonté de son Createur, ny mesme du lieu de sa naissance, qu'il le croie despourveu d'aucunes commoditez, & bien moins par consequent des aydes ou des soulagemens necessaires. Ce sera donc chez luy qu'il prendra de quoy guerir entierement les malades. Que s'il est besoin qu'il emploie des Remedes estrangers ou apportez de loing, & qu'il en use ainsi que des domestiques, il se servira pour cet effet des plus faciles, soit à trouver, soit à preparer; il laissera les penibles, & qui coustent cher, au degoust & au faste de cette sorte de malades, à qui la santé mesme est desagreable, s'ils ne l'achèptent au poids de l'or. Mais celuy que nous depeignons icy, tel que tout homme de bien doit tâcher d'estre, & qu'il se doit souhaitter, cherchera soigneusement dans l'élite qu'il aura fait de ses remedes, ce qui sert esgalement au Pauvre & au Riche, ce que le long âge, la droite Raison, & l'experience asseurée ont generalement approuvé, ce que l'usage ordinaire reçoit, & que l'evenement ne fait point blâmer. En cette liste il faut mettre l'Aloé, pour estre fort bonne à l'estomach; la Casse rafraichissante & qui adoucit:
la Manne

la Manne digne du nom qu'elle porte; le Rheu, que ie nomme effectif, & que ie laisse appeller Barbare, à ceux qui sont barbares eux-mêmes; le suc des Roses palles; le syrop de fleurs de Peschier; & celuy de Noir-prun. I'y adjousté sur tout le Senné, ou, pour mieux dire, le Sain, & qui est comme le Roy des Medicamens purgatifs, duquel qui ne sçait les proprieté & les vertus excellentes, celuy-la sans doute est vrayement estranger & ignorant en matiere de Medecine. Au contraire, quiconque le connoist par ses causes & par ses effets, ne feint point de le nommer vn *tout-remede*, vn *tout-vtile*; comme celuy qui tire de-hors toute humeur ennemie, & à qui doivent ceder, ou crever, tous les fourneaux des Coupe-bourses Paracelsites, & toutes leurs impostures recuites. Car il ne s'est iamais veu, qu'il ait *h* ou rongé les intestins, ou irrité le sang, ou embrasé les visceres. Il purge benignement, seurement, promptement. Pas vne de ses qualitez n'est nuisible. Il n'a jamais fait, & iamais il ne fera mal à personne donné à propos par nostre Dogmatique. Il est bon aux enfans, meilleur aux vieillards, & ne nuit point aux femmes enceintes. Avec ce peu de Remedes, qui peuvent beaucoup, le Medecin vertueux sera, come vn bon Genie, & vn vray Hercule, soit qu'il faille destourner les maux, ou les exterminer tout à fait, comme autant de monstres. Il luy sera facile de se passer de tous amas superflus, & il ne retranchera pas moins constamment, les penibles & invtiles confections des Arabes, qu'un bon General retranche de son Armée, tout l'Attirail & le bagage qui l'embarrasse. Il fouléra aux pieds la vaine pompe, & l'arrogant faste des Boutiques. Il ne mesprisera point la vertu de la Scammonée, mais il la fera

h Intestina
corradere,
vel sanguinem propri-
tare, &c.
*Fernel. lib.
5. Methodi,
cap. 10.*

marcher pourtant apres des remedes plus aisez, & qui ne sont pas toute fois de moindre efficace, pour estre aussi difficile de la temperer, que de la preparer, & s'abstiendra d'en vser, plustost qu'il ne laissera sujet d'en avser. Le Turbith, qui ne fait qu'irriter les visceres, n'aura rien de commun avec luy, sachant que c'est vne drogue qui ne sert qu'à esmouvoir les humeurs, avec vn effet esgalement pernicieux & dommageable. Loing, dira-t'il, cette amere Colocynthe; loing cet Ellebore; qu'il quitte la place à quelque Medicament meilleur que luy; que cet Elaterion, ce Ricinus, ce Sambuc, cet Euphorbion, cette Laureole, ce suc d'Iris, & tous ces autres venins, dont la malignité n'est que trop visible, cedent à ces Remedes salubres, qui sont toujours du bien, & iamais de mal. Car quoy que ceux-la puissent servir, si est-ce qu'ils sont souvent plus nuisibles que profitables; Et voyla pourquoy, sans les mettre en ligne de compte, chassons-les de nostre pratique. Que si les Empiriques par leurs Maximes, n'en abstiennent point leurs mains sanglantes; qu'au moins les malades trouvent moyen de s'en abstenir. Qu'ils fuyent ces ennemis mortels,

Et profitent ainsi du conseil qu'on leur donne.

Qu'ils ne tardent plus à se defaire tout de bon de ces Risqueurs de la vie humaine, de ces Ioüeurs hasardeux, de qui le malade est l'eschiquier; & comme leurs drogues malignes en sont les dez & les eschecs: s'ils font vn beau coup, ou s'il leur arrive bonne chance, ce n'est qu'une fois qu'elle leur advient par les points marqués dans la figure de Venus & de Senio, mais ils amènent à tout moment celle du chien, c'est à dire, le point fatal & mal-encontreux, de la mort du trop credule & misera-

ble malade, de la peau duquel, voire de sa vie, ces dangereux pipeurs se jouient impunément: Mais le vray & legitime Ouvrier, tiendra l'Antimoine, ou la contre-vie de tels operateurs ignorans, & qui ne tiennent aucune Methode, pour vn venin tres-mortel; & ne s'amusera point à le preparer, puis qu'il n'en scauroit venir à bout, pour estre vn si fort poison, qu'il ne quitte jamais, comme font quelques serpens, sa qualité veneneuse. Il le renvoyera donc aux Fondeurs & à leurs semblables, pour s'en servir à dissoudre les Metaux, en l'éloignant autant qu'il pourra, du Corps Humain, de peur que par ses approches il ne le mette à la Fonte, & qu'il n'en fasse vne dissolution encorè plus forte. Que si quelques-vns en sont reschappez, ç'a esté de mille-fois l'vne, & par vn grand coup de hazard; desorte qu'ils n'en doivent le remerciement qu'à leur âge, & à leur complexion robuste; non pas à l'Antimoine. Mais apres tout, encore trouueront-ils, que ce ne leur est pas vn grand avantage, d'avoir vne fois evité la mort, pour nourrir durant le reste de leur vie, au profond de leurs entrailles, vne ruïne intestine, & qui n'en doit iamais estre separée: Ce qui arrive sur tout au Ventricule, & econome de la vie, à qui cette Peste a déclaré vne guerre irreconciliable & mortelle. Que si les Chymiques connoissent la malignité de cette Droque, & ne la detestent point toutesfois; eux-mesmes ne sont-ils pas detestables? Au contraire, s'ils ne la connoissent point, pourquoy pressent-ils les malades de la prendre, comme s'ils leur tenoient le poignard sur la gorge? Il n'en est pas ainsi des aimables Dogmatiques; comme ils sont bien advisez & sages, aussi vont-ils plus sagement en besogne, & abhorrent l'indomptable malice de ce poison,

i De eius
veneni in-
domita ma-
litia, &c.
vide Cen-
surâ Scho-
læ Medicę
Parisiensis
adversus
Antimo-
nium apud
Casp. Hof-
mann. lib.
de medica-
ment. Offic.
lib. 3. cap.
90.

pource qu'ils en ont vne vraye connoissance. Mais que dirons-nous des Cardiaques, comme les nomment communément les Arabes, & les petites gens des Boutiques? Le prudent Medecin ne les iuge propres qu'à ceux qui manquent de sens & de courage; non plus que cet os qui se prend au cœur du cerf, ces perles, ce bezoïard, illustres degasts des facultez par qui nous respirons, ces pieces, ou ces raclures des pierreries, qui ne font qu'attenuer la vigueur de la vie humaine; la pierre lazule, l'al-kermes, l'hyacinthe, & mille semblables machines, qui ne sont propres qu'à tirer l'argent de ceux qui en ont fait amas. Il rejette bien loin ces poisons, qu'il croit estre de l'engeâce des Arts de Medée; & en estimant contagieux l'attouchement, ou mesme les approches, il les renuoye chez les Arabes, d'où ils sont venus au grand dommage des Hommes; du commerce desquels il les bannit genereusement & en vray Chrétien. Quoy davantage? Il attaque tous les maux, qui sont ennemis de la Nature, & les combat vaillamment fortifié de la saine Raison, de l'Experience certaine, & des Remedes bien approuvez. L'Apoplexie causée par vn regorgement de sang, qui est mesme pituiteux; la Lethargie, ou les autres maux assoupissans, sont tous contraints de ceder à la force de son Art; & il les surmonte heureusement, non par aucun Emetique ny Metallique, ny Vegetal, ny de telle autre nature, mais par l'ouverture de la Veine, par ventouses avec scarifications, par clysteres acres, & mesme par vne plus forte Purgation. Il en fait de mesme de l'Epilepsie, non par aucun Amulet ny physique, ny magic, mais bien par l'expulsion de la cause, qui de divers endroits s'esleve au Cerveau; comme encore par Inedie, par vomissement, par l'Aloë, par l'abstinence du vin,

*Uetus sanguinis.
Aurelius
Victor in epitome de
Caesaribus,
ubi de Elie
vero.*

du vin, par la fuite des fortes odeurs & des odieuses acrimonies. Outre cela, il dissipe le catarrhe & l'arreste, ou le destourne, par le moyen d'une Diete tres-exacte, non par aucuns grains infectez d'une malignité nuisible, non plus que par le funeste Laudanum, par le pernicieux Opium, par le dangereux Philonium, par les pilules de Cynoglosse. Mais bien par la section des Veines & des Arteres, & par la boisson continuelle de l'eau fresche. Quant à la Fièvre quarte, il la dompte par la seule Abstinence, & par l'usage du seul Sené donné en temps & lieu. Ces Chymiques, & encore une fois Chimeriques secrets; & tous ces grands mots de spécifiques, ne font qu'accroître plus fort l'aversion naturelle qu'il a pour eux; & il les laisse aussi pour ces Caco-chymiques tireurs d'Extraits, dont se puissent-ils toujours mal trouver, iusques à ce qu'ils soient devenus Sages. Il guerit l'Hydropisie Ascites avec la Rheubarbè & le Sené, comme aussi par les plus doux Hydrogogues, par la Paracentese & scarification des jambes; non par le moyen de ce brulant sel Chymique, ny de cette Poudre Blanche, qui trompe malheureusement le miserable Salt'inbañq; mais qui rend encore plus malheureux le malade qu'il entreprend de guerir; la Fièvre Pestilente, à qui la Theriaque, le Mithridat, & la confection d'Alkermes & d'Hyacinthe, sont comme autant de nouvelles Pestes; est enfin surmontée par son adresse: car il en arrache la cause avecque des purgatifs, & des rafraichissans aigrets, qui sont les vrais Cardiaques, non avec les faux & supposez, non par le Diambra, ny par l'esprit fugitif & mort des Perles, plus pernicieuses, que precieuses; ny par ce que le vulgaire raconte de la corne de Licorne, qui n'est qu'une fable;

58 *Question de Medecine à disputer à Paris, l'an 1648.*
 & qu'un fabuleux Remede aussi pour ceux qui en vsent
 ny par l'effronterie de cet insigne menteur, & de ce
 fourbe celebre l'Orvietan, qu'on pourroit nommer
 plus à propos Or-va-t'en, qui par vne trop grande in-
 dulgence de la sacrée Themis, a force de piperics & de
 beueuës, se jouë du simple peuple, qui ayme naturel-
 lement à estre trompé, amoureux qu'il est des nouveau-
 tez, & des bagatelles estrangeres. Le vray Medecin en-
 core remedie aux Varioles, qui sont des taches originel-
 les & mortelles à l'âge le plus tendre, se servant pour
 les guerir de la frequente Saignée, & sans nombre des-
 iny (qu'il ordonne mesme aux enfans qui sont à la mam-
 melle) & pareillement du jus de Citron & de Grenade,
 sans oublier le Sené, par la seule ayde duquel, il
 corrige l'intemperie des visceres, & guerit en effet, se
 montrant ainsi en tout & par tout, sage & fidele Mini-
 stre de la Nature, à l'imitation & par l'ordre de laquel-
 le il travaille. A la Purgation & à la Saignée, il donne
 comme pour Gouvernante, & pour Garde, vne façon
 de vivre réglée, qu'il fait secourir & seconder de Bains
 donnez à propos, & des *m* naturels mesmes; ensemble
 des eaux minerales, & de l'usage du lait, tel qu'à peu
 près le requierent les forces du malade, & la nature &
 la condition de la maladie. A quoy il fait contribuer
 encore beaucoup le changement d'air & de lieu, le di-
 vertissement de la campagne, le contentement de l'es-
 prit, la joye du cœur, & la charmante recreation des
 sens: ce qu'il ne fait pas toutesfois, sans y apporter l'or-
 dre requis, & la Methode necessaire. Il rend ainsi
 l'Homme à soy-mesme, & semble le refaire tout de
 nouveau. Or comme il s'en peut dire le Gouverneur,

πρὸς αὐτοποῦν
 Metallica-
 rum aqua-
 rum. Gal.
 lib. 7. meth.
 med. cap. 4.

luy pareillement se laisse gouverner & conduire à la faveur du Temps, du Lieu, de l'Art, de la Methode, & des Indications, qui luy sont des Guides infaillibles.

*Donc la Methode d'Hippocrate est entierement & sans reserve,
la plus certaine, la plus seure, & la plus excellente
à guerir, de toutes autres Methodes.*

A ces Thefes respondra IEAN-BAPTISTE
MOREAU, Parisien, l'an du Seigneur,
M. DC. XLVIII.

*(Dans le Catalogue des Theses par Baron
cette transcription française n'est pas indiquée)*
